

Dxihtsi nin baca'h San Pahblu loh ra' bwiinn Galacia

GuelrgahpaDxiohs

1 Na'h Pahblu, naann pooxtla xteenn Jesucristu. Ayi bwiinn ra' dxi'h baxe'hla na'h nin ayi za la'h ra' dxi'h ba bazuh na'h sino que la'h Jesucristu cun Xtaada Dxiohs Ñi'h nin nuu llaa'ndxibaa'; Dxiohs nin bacwa'hnn la'h Jesucristu loh ra' bwiinn guuchi, la'h Ñi'h gulii na'h gaca'hnn xpooxtla Ñi'h.² Na'h nee cun garaa ra' lasaa' ra' nu'h nin naa pur xcweenta Jesucristu nin rii ra' rii', raca'h nu dxihtsi rii' para la'h ra' bwiinn guido' nin nuu ra' nez loh guihdxyi xteenn Galacia.³ Gulguica'ha guelruhnntaa'y i xteenn Dxiohs nin naa Xtaada nu'h, cun guelriidxyi sto' xteenn Ñi'h neezaa xcweenta Daada Jesucristu.⁴ La'hgahca la'h Ñi'h badi'ihi Ñi'h la'h Ñi'h guah Ñi'h loh cruhzi tin guhlda'h Ñi'h la'hnu'h loh duhlda xteenn guidxyiyuh rii', ziga gunabwa' Yu'bi Xtaada Dxiohs nu'h.⁵ Ba lasahca duxa naa lah Dxiohs para tu'pazi. Zi'chi gaca pwihs.

Ayi stuhbi dxyi'dxyi nin
guta'h la'h bwiinn loh duhlda
ziga xchi'dxyi Dxiohs

⁶ iHasta radxyigaa' duxa za loon
ziga tan lwehgutii' cabwe'he sto' tu

la'h Dxiohs nin gudihdxyi la'htu cun guelruca'h sto' nin nahpa Crixtu cun la'hnu'h, tin zeena'hla tu guriincaa dxyi'dxyi!⁷ Ayi stuhbi dxyi'dxyi nin zahca guta'h la'hnu'h loh duhlda, sola nuu ra' nin xclaa'dzi gusiahchi sto' tu cun stuhbi ra' dxyi'dxyi; xclaa'dzi ra' ba gucha'h ra' ba xchi'dxyi Jesucristu.⁸ Per sidela chyuulla cagaluu'y i la'htu guriincaa stuhbi dxyi'dxyi nin rñi' ra' ba ruta'h la'h bwiinn loh duhlda, dxyi'dxyi nin ayi naa lasaa' dxyi'dxyi nin ba baluu'y i nu loh tu; bwiinn chi ya guyuu'dii ba, ayi xi ruhnn nicala na'hzahn, o tuhbi aanjla nin dxiinloh nez dxibaa'.⁹ La'n guñi' lan desde galohyi, yannah la'n cañi' la'ga'hnn stuhbi: Sidela chyuulla ruluu'y i la'htu stuhbi dxyi'dxyi nin rñi' ba rta'h la'h bwiinn loh duhlda, nee ayi naan ziga dxyi'dxyi nin ya baluu'y i nu la'htu, bwiinn chi ya guyuu'dii ba.

¹⁰ Chin rñi'n squii', ñta rluu'y i xclaa'dzihñ guiní' za'ca bwiinn xcwee'ntahn?, o ñta cadxi'hyiñ nez gusia'xiñ la'h bwiinn ra'? Pwihs sidela na'h ñi'dxi'hyiñ nez sola ñusia'xiñ la'h ra' bwiinn,

pwihsí ayí ñahca'hn tuhbi xmooza Jesucristu.

Xeweenta xtsi'n Pahblu

¹¹ Per gulgahcabwa' dee' bwiitsi ra'n; dxyi'dxyi nin ruta'h la'h ra' bwiinn loh duhlda nin rulu'yí'hn la'h tu, ayí naa ra'n xigaaba ra' bwiinn guidxyiyuh. ¹² Ayí loh ra' dxi'h bwiinn guidxyiyuh bwi'hnna'hn guca'hahn dxyi'dxyi ra' rii', nee nin ayí za chyu baluu'yin na'h, sola la'h Jesucristu bani'hi xchi'dxyi Ñi'h rii' na'h.

¹³ La'htu ya naann tu xa za'bí dxyi'dxyi xa guhca'hn cadxyih, chin gwazahne'hn xlehyi guehtu Moisehs, pwihsí basa'cazii duxa'hn la'h ra' bwiinn guido' ra' nin gwachii sto' ra' ñi'h xchi'dxyi Jesucristu, nee guclaa'dzihñ ñuñi'chiloora'n ba. ¹⁴ Loh ra' nin ruzo'badxiahga xlehyi guehtu Moisehs, na'h guhca'hn tuhbi bwiinn nin mahziru gucabwa' ziga naa xlehyi Moisehs loh ra' lasaa' ra'n nin naa xedah ra'n; guhcabwa'ruhn loh ra' ba, loh ra' bwiinn laadxyihñ; mahzi ru guza'bí sto'n costumbre ra' xtaadaguldoo' ra'n. ¹⁵ Per Dxiohs gulii na'h nee gulii Ñi'h na'h desdeyi chin nuu'huhn sto' xmaa'n, ni'chin gudihdxyi Ñi'h na'h pur tantu nin ruca'h sto' Ñi'h na'h. ¹⁶ Chi'chi bwi'hnn Dxiohs para biu'nbwa'n la'h Llìi'n Ñi'h, tin zi'chi gulu'yí'hn xcweenta xchi'dxyi Ñi'h nin guta'hl la'hra' bwiinn loh duhlda nez loh ra' bwiinn ra' nin ayí naa ra' bwiinn Israel. Chin guhca zi'chi, ayí chyu bagati'dxi dzi'na'hn, ¹⁷ nin ayí za guyaa'hahn loh guihdxyi

Jerusalehn para ñagaanñin loh ra' nin naa ra' pooxtla galohyi que na'h. Pwihsí mahzi na'h guyaa'hahn nez loh guihdxyi Arabia, ya chi'chi gubia'gariin para nez guihdxyi Damascu.

¹⁸ Ya chin guhca chohnna yihza, chi'chiyi guyaa'hahn loh guihdxyi Jerusalehn, ya chi'chiyi biu'nbwa'n la'h Pehdru, nee guyuu'huhn tsí'ñu gubihdxyi ri'chi, ¹⁹ per ayí bwa'hahn loh nin stuhbi chyu stuhbi ra' pooxtla ri'chi, sola la'h si Jacobo bwihtsi Jesucristu bwa'hahn. ²⁰ Pwihsí na'pahn siguhra nez delaanta loh Dxiohs, ayí naa xchi'dxyi'hn dxyi'dxyi xiñ, sino que guchii naa nin cagaca'hn. ²¹ Chi'chi guyaa'hahn loh ra' guihdxyi xteenn Siria, cun neezaa nez loh guihdxyi Cilicia. ²² La'h ra' bwihtsi ra' nu'h nin naa xpwiinn guido' Crixtu nin nuu ra' nez loh guihdxyi ra' xteenn Judea la'n dxyih ra' chi, ayí nu'nbwa' ra' ba na'h ziga xa rñiaa'hahn, ²³ sola guyaa'zi dxiahga ra' ba rahbi ra' bwiinn: "Ni'ca nin guca'hna'hlá la'hnu'h, nee nnah bwa'ha la'h ba cagaluu'yi xchi'dxyi Jesucristu, nee dxyi'dxyi ra' ca nin guclaa'dzi ba ñuñihchiloh ba." ²⁴ Ya chi'chi riiñi' za'ca duxa ra' ba xcweenta Dxiohs nin nuu dxibaa' laasii gwachii sto' zahn xchi'dxyi Ñi'h.

Bidxa'ga Pahblu loh ra' pooxtla

2 Chin guhca tsí'dah yihza, chi'chi guyaa'hahn stuhbi nez loh guihdxyi Jerusalehn cun Bernabéh, neezaa Titu gwane'hehn. ² Guyaa'hahn laasii Dxiohs baluu'yi na'h nahpa guyaa'hahn

tin balu'yi'hn xa gwachii sto' ra'
bwiinn ra' nin ayi naa ra' bwiinn
Israel xcweenta xchi'dxyi Jesucristu
nin ruta'h loh duhlda. Balu'yi'hn
dxyi'dxyi ra' rii' loh ra' nin
rnabwa' guido' xteenn Jesucristu
ri'chi; bwi'hnna'hn squii' laasii ayi
xclaa'dzihñ nahca nin bwi'hnna'hn
cun nin cayu'nnahn dzi'n lliaa' si,
³per nin la'h Titu, nin ze'l dane'hn,
nin naa tuhbi bwiinn grieahu nin
ayi naa tuhbi bwiinn Israel, ayi
guyuu' chyu ñuhnn jwersi ñuu' bi
bwa' tiixi bi ziga nin caa loh xlehyi
Moisehs nahpa chuu bwa' tiixi
bwiinn nin guzo'badixahga lehyi
chi. ⁴Pwihsu guchii nuu' ra' bwiinn
ra' nin ruhnn ra' zi ziga naa ra'
ba lasaa' ra' nu'h; bidxa'ga ra' ba
loh ra' nu tin guhlda'tsi ra' ba xa
raann ra' nu'h Dxiohs. Rdxyi'chi
ra' ba laasii naa nu'h xpwiinn
Jesucristu, ya ayi chyu ruhnn ziga
bwi'hnna'hn ra' xtaada guldoo' ra' nu.
La'h ra' ba xclaa'dzi ra' ba guche'h
ra' ba yihca ra' nu, xclaa'dzi ra' ba
gazo'badixahga ra' nu'h xchi'dxyi
ra' ba. ⁵Per la'hnu ayi chyu
bazo'badixahga xchi'dxyi ra' ba,
laasii xclaa'dzi nu cheezah chechii
sto' tu xchi'dxyi Jesucristu nin
ruta'h la'h bwiinn loh duhlda.

⁶Pwihsu nin tuhbi dxyi'dxyi cuubi
ayi guñi' ra' nin naa ra' bwiinn
dzi'baloh ra' chi loon; nicala na'h
ayi radxyigaa'hahn chyuullaa
guhca ra' ba galoh laasii Dxiohs
ruhnn chi'h zi Ñi'h tuhbiloh loh
garaa ra' bwiinn. ⁷Loh nin ñuni'hi
ra' ba tuhbi dxyi'dxyi cuubi na'h,
mahzi bwa'ha ra' ba Dxiohs baca'bi
na'h para gulu'yi'hn xcweenta
xchi'dxyi Dxiohs nez loh ra' bwiinn

ra' nin ayi naa ra' bwiinn Israel,
ziga za baca'bi Ñi'h la'h Pehdru tin
ruluu'yi ba xchi'dxyi Dxiohs nez loh
ra' bwiinn ra' nin naa ra' bwiinn
Israel. ⁸Pwihsu la'h gahca Dxiohs
nin guxe'hla la'h Pehdru ziga
pooxtla nez loh ra' bwiinn Israel ra',
la'h gahca Dxiohs chi guxe'hla za
na'h ziga tuhbi pooxtla nez loh ra'
bwiinn ra' nin ayi naa ra' bwiinn
Israel.

⁹Ni'chin ziga Jacobo, Pehdru,
cun Jwahn nin naa ra' bwiinn
dzi'baloh ru loh bwiinn guido'
ra' xteenn Jesucristu nez
Jerusalehn, guhcabwa' ra' ba
la'h Dxiohs cayuhnn cayahcanee
na'h, chi'chi bani'hi naa ra' ba
tin bagahpaDxiohs ra' ba na'h
cun neezaa Bernabeh, tin sehn
rii' ruluu'yi naa ra' ba tuhsu cun
la'hnu ziga choodi'hnn nu dzi'n
nez loh ra' bwiinn ziit u ra' nin ayi
naa ra' bwiinn Israel ra' ya la'h
ra' ba dxia'han ra' ba guluu'yi
ra' ba la'h ra' bwiinn Israel ra'.
¹⁰Cun sola gunaaba ra' ba loh nu
gachidxiaacanee nu la'h ra' bwiinn
prohbi ra', nee lligaaba pa'h za rii'
nuu'huhn.

Pahblu gudxi'ldxinee dxyi'dxyi la'h Pehdru loh guihdxyi Antioquía

¹¹Per chin gwah Pehdru nez
loh guihdxyi Antioquía, chi'chi
basi'xtuhyi hn la'h ba, laasii ziga
cayuhnn ba ayi naa bwen ni'chi,
¹²pwihsu galoh tuhbi loh mweella
gudahwnee ba la'h ra' bwiinn ziit
ra' nin ayi naa ra' bwiinn Israel,
per ya chin badzihñ paaldaa ra'
bwiinn ra' nin guxe'hla Jacobo,
chi'chi dxyigahsi biria'caa ba nez

loh ra' bwiinn ziit u ra' chi, ya ayi ru gudahwnee ba la'h ra' ba, laasii guyuu' guelrzaa' ba la'h ra' bwiinn Israel ra' nin badzihñ ri'chi nin ze'nee bwa' nin laa circuncisión.

¹³ Ya na'lzu gahca ra' garaa ra' bwiinn Israel ra' nin naa tuhsí cun Pehdru xmahn Pehdru nee ra' ba guhca chiohpa loh xigaaba ra' ba hasta nee Bernabéh bwi'hnn zi'chi.

¹⁴ Per chin bwa'hahn ayi zeezahnee ra' ba ziga naa xchi'dxyi Jesucristu, chi'chi ra'pihn loh Pehdru delaanta nez loh ra' garaa ra' bwiinn guido'ra!: "Sidela yi'h nin naa lu'h tuhbi bwiinn Israel, nuu nabahan lu'h ziga zi tuhbi bwiinn nin ayi naa bwiinn Israel ayi ziga dxi'h bwiinn Israel,  xixnaa chi'h xclaa'dzi lu'h guibahan ra' bwiinn ra' nin ayi naa ra' bwiinn Israel ziga zi bwiinn Israel?"

**Bwiinn Israel ra' cun garaa ra'
za ra' bwiinn, nahpa chechiisto'
ra' xchi'dxyi Jesucristu tin
chapitiu xtuhlda ra' ba**

¹⁵ Ra'pizahn loh ba: "Bwiinn Israel ra' nu'h desde chin guulaayi ra' nu'h, ayi bwiinn duhlda dxi'h ziga naa ra' bwiinn ziit u ra'. ¹⁶ Ya naann nu'h ayi tuhbi bwiinn nin chapitiu xtuhlda ni'h chin guunn ba ziga nin caa loh lehyi, sino que sola chechii sto' nu'h xchi'dxyi Jesucristu. Ni'chin nin gwachii sto' nu'h xchi'dxyi Jesucristu tin guzia'tii Ni'h xtuhlda nu'h laasii nin riachii sto' nu'h, ayi pur nin rihnn dxi'h nu'h nin caa loh lehyi. Pwihsí ayi nuu guzia'tii lehyi xtuhlda bwiinn ziga sola guzo'badxiahga ba xcuenta si ziga naa xlehyi guehtu Moisehs."

¹⁷ Pwihsí loh ziga nin xclaa'dzi nu'h dxiaa xtuhlda nu'h xcweenta guelriachii sto' la'h Jesucristu, sidela raluu'yí nu'h dxuudi'hnn ru nu'h duhlda,  ta zahca gachiñi' nu'h: "Jesucristu ruluu'yí zahca guidi'hnn ru nu'h duhlda"? iAyi gaca zi'chi! ¹⁸ Pwihsí sidela na'h gutsiyyihñ xiilla ya lwehgu gahca dxiu'nza'cañin, pwihsí naan tuhbi bwiinn duhlda, ¹⁹ laasii cun xcweenta lehyi la'n naa ziga zi tuhbi bwiinn guuchi. Pwihsí ayi ru nuu guinabwa' lehyi na'h laasii nnah nabahanahn loh xneziuh Jesucristu. Pwihsí la'h gahca lehyi bwi'hnn naan ziga zi tuhbi bwiinn guuchi chin guhcabwa'n ayi nuu guzo'badxiaagahn garaa nin caa loh lehyi. ²⁰ Pwihsí naan ziga zi nin guhchinee la'h Jesucristu loh cruhzi, pwihsí ni'chin nnah ayi ru naan na'h nin nabahanahn sino que Jesucristu naa nin nabahan nez la'n lasto'n, ya guelnabahanahn nin nabahanahn loh guidxyiyuh rii' nabahanañin pur nin riachii sto'n xchi'dxyi Llii'n Dxiohs, nin bacal' sto' Ni'h na'h ya guhchi Ni'h loh cruhzi xcwee'ntahn. ²¹ Pwihsí na'h ayi xclaa'dzihn cwe'he sto'n xquelralahsa sto' Dxiohs, per sidela zahca gusiaa lehyi xtuhlda bwiinn tin gaca ba bwiinn nayaan nez loh Dxiohs, ya chi'chi lliaa' zi guhchi Jesucristu.

Guelriachii sto' rusiaa duhlda

3 iAyy bwiinn Gálatas ra',
xiipa'h bwiinn nahda tu!
 Chyulla bache'h la'htu, tin ayi
ru guzo'badxiahga tu xchi'dxyi
Jesucristu? iNee nez loh pa'h tu

bwii'yidxyi'dxyi nu xa gucah
Jesucristu loh cruhzi! ²Pwihs
nnah tuhbi si dxyi'dxyi xclaa'dzih
guiñi' tu loon: ¿Ta guyuu'tii'
Spíritu Saantu sto' tu pur cun sola
bazo'badxiahga tu nin caa loh lehyi,
o pur nin gwachii sto' tu dxyi'dxyi
nin bihn dxiahga tu? ³iXipa'h
dxiipa naa sto' tu! ¿Xa guzo'baloh
chi'h tu ziga guca'ha tu Spíritu
Saantu Dxiohs nee nnah xclaa'dzi
tu guunn tu nin zie'gadziiba chi'h
zi yiheca tu guunn tu? ⁴¿Ta lliaa'
zi batil'dxiloh tu guelrza'cazii pur
guelriachii sto' xteenn tu? Per ¿xa
gaca garia'caa lliaa' zi batil'dxiloh
tu guelrza'cazii chi? ⁵Chin runi'hi
Dxiohs Spíritu Saantu Ñi'h loh tu,
chin ruhnn Ñi'h milahgru nez loh
tu, ¿xa ruhnn Ñi'h? Ayi ruhnn
Ñi'h laasii ruhnn tu ziga nin caa
loh lehyi, sino que laasii riachii sto'
tu xcweenta nin bihn dxiahga tu.

⁶Guehtu xtaada guldoo' nu'h
Abrahn gwachii sto' ba xchi'dxyi
Dxiohs, ni'chin nin guca'ha Dxiohs
la'h ba ziga tuhbi bwiinn nin naya
lasto' ñi'h, ⁷ni'chin gulgahcabwa'
dee': Garaa ra' nin riachii sto' ra'
ñi'h xchi'dxyi Dxiohs, rñi' Dxiohs
naa ra' ba llii'n guehtu Abrahn.
⁸Galohyi naann Dxiohs xcweenta
guelriachii sto' zusiaa Ñi'h lasto'
ra' bwiinn nin ayi naa ra' bwiinn
Israel, ni'chin nin rabbi Ñi'h loh
guehtu Abrahn: "Garaa ra' bwiinn
guidxyiyuh zahcataa'yi xcweenta
lu'h." Dxyi'dxyi ra' rii' gucah loh
dxihtsi ra' nin guhca galoh, hasta
caa xchi'dxyi Dxiohs. ⁹Ni'chin la'h
ra' nin riachii sto' ra' ñi'h, nnah la'h
Dxiohs cayahcanee la'h ra' ba ziga

gahca guhcanee Ñi'h la'h guehtu
Abrahn, nin gwachii sto' la'h Ñi'h.

¹⁰Garaa ra' nin riuyuhnn ra' sola
ziga nin caa loh xlehyi guehtu
Moisehs, ya naa ra' ba bwiinn
dii ra' laasii squii' caa loh dxihtsi
xteenn lehyi: "Garaa ra' bwiinn
nin ayi guza'loh guunn ra' ziga nin
ruluu'yi lehyi, ziuu' dii ra' bwiinn
ra' chi." ¹¹Pwihs ayi chyu naa
bwiinn naya nez loh Dxiohs sidela
razo'badxiahga nu'h xcweenta
lehyi, laasii squii' naa xchi'dxyi
Dxiohs: "Sidela riachii sto' tuhbi
bwiinn xchi'dxyi Dxiohs, bwiinn
chi naa ba tuhbi bwiinn naya nez
loh Dxiohs, nee nabahannee ba
Dxiohs pur xcweenta guelriachii
sto' xteenn ba." ¹²Ya lehyi xteenn
Moisehs ayi naan ziga chechii sto'
bwiinn xchi'dxyi Dxiohs, laasii
squii' rñi' loh lehyi: "Bwiinn nin
guzo'badxiahga dxyi'dxyi ra' rii',
zibahan ra' ba pur xcweentan."

¹³Jesucristu bata'h Ñi'h la'hnu'h
loh dii xteenn lehyi laasii la'h Ñi'h
guhchi Ñi'h pur xcweenta xtii nu'h
loh tuhbi yahga cruhzi ziga zi
baria'caa Ñi'h ziga zi tuhbi bwiinn
dii, laasii loh Xchihtsi Dxiohs caa
squii': "Bwiinn dii ra', naa ra' garaa
ra' nin rahchi rza'bina'hla loh tuhbi
yahga." ¹⁴Dee ra' guhca ra'n tin
guya'loh xcweenta guelruhnntaa'yi
nin bia'han dxyi'dxyi Dxiohs loh
guehtu Abrahn tin pur xcweenta
Jesucristu guica'ha ra' bwiinn
nin ayi naa ra' bwiinn Israel ra'
guelruhnntaa'yi chi; ya tin zi'chi
za garaa ra' nu'h pur xcweenta
guelriachii sto' rachica'ha ra'
nu'h Spíritu Saantu nin bia'han

dxyi'dxyi guixe'hla Dxiohs para la'h
ra' nu'h.

**Lehyi nee dxyi'dxyi nin bia'han
dxyi'dxyi Dxiohs loh guehtu Abrahn**

¹⁵Bwiitsi ra'n, la'n guiñi' loh tu
tuhbi dxyi'dxyi xcweenta bwiinn
guidxyiyuh. Chin ziga tuhbi bwiinn
ruhnn ba tuhbi dxihtsi tin dxia'han
dxyi'dxyi ba cun stuhbi bwiinn,
nicala bwiinn guidxyiyuh ra' ba, per
chin ya bat'i'dxi firma garoopa ra' ba
loh dxihtsi chi ayiru nuu chyu xa
guunn para xi guicah ru loh dxihtsi
chi nee nin ayiza nuu chyu guzia'tiin
nin caa loh dxihtsi chi. ¹⁶Pwihsi
naann nu'h, Dxiohs badi'hi xchi'dxyi
Ñi'h nez loh guehtu Abrahn nee cun
neezaa loh llahga ba, ayi guñi' Ñi'h
llahga ra' guehtu Abrahn ziga loh
ziahán ra' ba, sino que guñi' Ñi'h
xcweenta tuhsí bwiinn, ya bwiinn
chi naa la'hsí Jesucristu. ¹⁷Dxyi'dxyi
nin xclaa'dzihn guñi'n loh tu
naa squii!: Dxyi'dxyi nin bia'han
dxyi'dxyi Dxiohs loh guehtu Abrahn
guñi' Ñi'h loh ba chin caya'dxi
zatahpa gaywa'h galabí tsi'h yihza
gadzihñ lehyi loh Moisehs, tin la'h
Moisehs bat'i'dxi lehyi rii' nez loh
ra' bwiinn Israel. Per ayi bwi'hnn
lehyi gahn ñucha'h dxyi'dxyi nin
bia'han dxyi'dxyi Dxiohs loh guehtu
Abrahn, laasii xchi'dxyi chi'h zi Ñi'h
lasahca. ¹⁸Pwihsi sidela herensi nin
bia'han dxyi'dxyi Dxiohs loh guehtu
Abrahn naan pur xcweenta xteenn
xlehyi Moisehs, pwihsi ayi xi herensi
guhpá Abrahn loh Dxiohs; per ziga
nnah la'h Dxiohs basia'hanné
herensi la'h Abrahn laasii desde
galohyi bia'han dxyi'dxyinee Ñi'h
la'h Abrahn.

¹⁹¿Xi pur badi'hi Dxiohs lehyi nez
loh guehtu Moisehs? Badi'hi Dxiohs
lehyi laasii guza'bi duxa ra' bwiinn
Israel loh duhlda, tin guhcabwa'
ra' ba xa naa xcweenta xtuhlda ra'
ba, gaduhbi nin ze'-yalda dxyih nin
dxi' nin naa Llahga Abrahn, laasii
zi'chi bia'han dxyi'dxyi Dxiohs
cun la'h Abrahn. Ya ziga lehyi
xaanjla Dxiohs badi'hi lehyi la'h
guehtu Moisehs, tin la'h ba guhca
ziga tuhbi bwiinn nin rusia'lda
dxyi'dxyi. ²⁰Tuhbi nin rusia'lda
dxyi'dxyi ayi naa ba par tuhbi si
bwiinn, per Dxiohs tuhsí naa Ñi'h.

Xcweenta lehyi

²¹¿Ta guriincaa naa lehyi Moisehs
loh dxyi'dxyi nin basia'han Dxiohs
loh guehtu Abrahn? iXa gacan
zi'chi! Sidela ñachica'ha nu'h tuhbi
lehyi nin rahca runi'hi guelnabahan,
chi'chisihn xcweenta lehyi chi
ñica'ha bwiinn guelnabahan nayaa,
²²per loh xchihtsi Dxiohs rñi'
squii!: Garaa ra' bwiinn nuu ñie'w
loh duhlda, per tuhbi bwiinn nin
chechii sto' ñi'h xchi'dxyi Dxiohs
ziga gwachii sto' guehtu Abrahn,
bwiinn chi guica'ha guelriachii
sto' xteenn dxyi'dxyi xcweenta
Jesucristu ziga bia'han dxyi'dxyi
Dxiohs loh guehtu Abrahn.

²³Chin nagahdxi gadzihñ
xcweenta guelriachii sto' xteenn
xchi'dxyi Jesucristu, chi'chi
guna'zu ñie'w lehyi la'hnu'h loh
duhlda; dxuuleeza chi'h zi nu'h
garia'lcaa guelriachii sto' xcweenta
xchi'dxyi Jesucristu. ²⁴Ni'chin nin
naa lehyi ziga xmwehsu nu'h tin
guluu'yin la'hnu'h neziuh nez loh
Daada Jesucristu tin gusiaa Ñi'h

xcweenta xtuhlda ra' nu'h cun
guelriachii sto' xteenn xcweenta
xchi'dxyi Ñi'h. ²⁵ Per nnah ziga ya
nahpa nu'h guelriachii sto' xteenn
xcweenta xchi'dxyi Ñi'h, ayiru chyu
guichi'hn tuhbi mwehsu ziga lehyi.

²⁶ Laasii pur xcweenta guelriachii
sto' garaa tu naa tu llii'n Dxiohs
xcweenta ziga naa tu tuhsii cun
Jesucristu, ²⁷ laasii garaa tu ziga
gurohbañihsa tu loh xchi'dxyi
Jesucristu, naa tu xpiwinn
Jesucristu. ²⁸ Ayiru xi guelrzaa'
chuu tu nicala naa nu'h bwiinn
Israel o bwiinn griechu ra', o
bwiinn nin gudoo'tii' ziga mooza
ra', o bwiinn nin ayi naa mooza
ra', ndxi'hw o gunna'h; laasii
garaa ra' nu'h naa tuhsii nez loh
Jesucristu. ²⁹ Ya sidela naa tu
xpiwinn Jesucristu, pwihsii naa tu
llahga guehtu Abrahn ya zica'ha tu
ziga herensi nin bia'han dxyi'dxyi
Dxiohs gudi'hi Ñi'h la'h guehtu
Abrahn.

4 Dxyi'dxyi nin xclaa'dzih
guiñi'n loh tu naa squii': Nin
rca'ha guelnaza'ca, chin naa bi
biñi'n, naa bi ziga zi tuhbi mooza
nicala xteenn bi gahca garaa nin
naa xteenn xtaada bi. ²Nuu tuhbi
bwiinn nin rahpa la'h bi, nee
nuu za tuhbi bwiinn nin rnabwa'
xcweenta xixteenn bi, para hasta
gadzhnyi dxyih nin baca'bwa'
xtaada bi guica'ha bi nin gudi'hi
xtaada bi la'h bi. ³Ya zi'ca za
rzahca ra' nu'h chin naa nu'h biñi'n;
guyuu' nu'h guhca nu'h mooza loh
lehyi, gunabwa'n xi ni'ca ayi nuu
guidi'hnn nu'h loh guidxyiyuh,
⁴ per chin bazaa' dxyih nin bazo'bwa'
Dxiohs, baxe'hla Ñi'h Llii'n Ñi'h,

guulaa Llii'n Ñi'h pur tuhbi gunna'h
ya bi' Ñi'h ziga tuhbi bwiinn
Israel nin nahpa bazo'badxiahga
xcweenta lehyi. ⁵ Bi' Ñi'h squii' tin
bata'h Ñi'h la'hnu'h ziga naa nu'h
bwiinn nin nuu lahtsinaa xteenn
lehyi, tin zi'chi gaca guunnllii'n
Dxiohs la'hnu'h.

⁶ Per laasii ya naa tu llii'n Ñi'h,
ni'chin baxe'hla Dxiohs Spíritu
Saantu xteenn Llii'n Ñi'h tin
cweezaa Ñi'h lasto' tu, ya la'h Ñi'h
rní' loh Dxiohs xcweenta nu'h:
"Yu'bilu'h, Xtaada nu." ⁷Pwihsii naa
ra' nu'h llii'n Dxiohs, ya ayiru naa
ra' nu'h ziga mooza zi. Ya pur nin
naa ra' nu'h llii'n Dxiohs, pwihsii
zuni'hi Dxiohs guelnaza'ca la'h nu'h
xcweenta Daada Jesucristu.

Riuu' Pahblu guelrzaa' pur xcweenta bwiinn Galacia

⁸Pwihsii chin nagahdxi dxiu'nbwa'
tu Dxiohs, nuu na'zu guelrusagui'hi
xteenn ra' dxaan ra' nin nnaasto' tu
naa Dxiohs la'htu per ayi Dxiohs
ra' dxi'h ni'chi ra', ⁹ ni'chin nnah
nin nu'nbwa' tu Dxiohs o nu'nbwa'
Dxiohs la'htu, ɿxaalla cheezah
chi'h tu loh ra' guelrusagui'hi nin
guyuu' tu galoh chin guunn tu la'h
ra' dxaan ra'? ¹⁰La'htu zeezahnee
gahca tu rahpadaa tu loh dxyih
ra', bwe'hw ra', bwe'hw ra' nin
mahzi lasahca cun yihza ra' ziga
caa loh xlehyi Moisehs. ¹¹Nuu
guelnadxyi'bi lasto'n nnagah
garia'caa gaca xtsi'na'hn nez loh tu
dzi'n lliaa' zi.

¹²Bwiitsi lasaa' ra'n, rna'ba'hn
loh tu gulgahca ziga pa'h na'h,
laasii na'h gwachii sto'n xchi'dxyi
Jesucristu ziga za gwachii sto' tu;

ayi xi dzi'n dxaaba baca'chiah tu na'h chin guyuu'huhn nez loh tu. ¹³La'htu ya naann tu chin balu'y'i hn xchi'dxyi Jesucristu loh tu, bwi'hnnañin pur xcweenta tuhbi gueldxyihdxyi nin basa'cazii na'h, ¹⁴ya gueldxyihdxyi nin guhca'hn, guhcan ziga tuhbi guelruti'dxiloh para na'h, per ayi pur ni'chi dx'i'h ñibwe'he sto' tu na'h, sino que bwi'hn tu na'h ziga zi tuhbi xaanjla Dxiohs, nee cun ziga zi na'h ñahca'hn ziga Jesucristu. ¹⁵¿Xa guhca cun guelnasaa xteenn tu nin guhpa tu chi'chi? Per rñi'n loh tu, sidela ñibwe'he hasta bizloh tu ñuni'hi tu na'h, zi'chi ñuhnn tu; ¹⁶yannah ¿la'hlala rdxyi'chi tu laasii cañi'n dxyi'dxyi nin guchii loh tu?

¹⁷Nnah nuu ra' bwiinn ra' nin ruhnnz ra' ziga nin zeezahnee lehyi nee ruhnnloh ra' ba zigazi nin ruca'h sto' ñi'h la'htu, per nin xclaa'dzi ra' ba naa gabwe'he ra' ba la'htu tin ayiru chechii sto' tu xchi'dxyi'hn, tin chena'hla tu la'h ra' ba, tin guzo'badxiahga tu xchi'dxyi ra' ba. ¹⁸Ayi guunn tu lligaaba riuu'llahna'hn pur la'h tu. Pwihsi naa bwen guluu'yi snuhn ra' bwiinn balaaca ruca'sto' ra' ba la'h tu, per nahpa gacan cun gaduhbi sto' ra' ba nee nahpa gacan garaa dxyih, ayi chin zu'hsidxi'hn nez loh tu. ¹⁹Llii'n ra'n, xcweenta tu cagati'dxiloon guelrza'cazii ziga zi ruti'dxiloh tuhbi gunna'h loh trabahjw xteenn guelnazihdzi chin rahlaa llii'n ba; nahpa zu'ti'dxiloo ruhn guelrza'cazii hastayi chin guluu'yi tu canabwa' pa'ca Jesucristu la'n lasto' tu. ²⁰Malaayi ñuu' xa ñahca zu'hn

nezca tin guiñi'n loh tu xiilla stuhbi dxyi'dxyi, per ziga nnah zihtu nuu'huhn ayi rahcabwa'n xa ni'ca gu'nnahn lligaaba xcweenta tu.

Dxyi'dxyi xcweenta Agar cun la'h Sara

²¹Gulguiñi' loon, la'h tu nin xclaa'dzi guunn ziga nin caa loh dxihtsi xteenn lehyi, itayi rahcabwa' tu, tayi rihn dxiahga tu xi caa loh lehyi? ²²Guldxihm dxyi'dxyi squii' caa loh lehyi. Guyuu' chiohpa llii'n guehtu Abrahn; tuhbi bi naa llii'n gunna'h nin guhca xmooza ba nin biria'hlah Agar, stuhbi bi naa llii'n gunna'h nin naa che'hlala pa'caa ba nin biria'hlah Sara. ²³Ya llii'n gunna'h nin naa xmooza ba guulaa llii'n gunna'h chi laasii xigaaba ba guhca ziga guyuu' llii'n xmooza ba, per ya ziga llii'n che'hlala pa'hcua ba guulaa bi laasii zi'chi bia'han dxyi'dxyinee Dxiohs la'h Abrahn. ²⁴Dxyi'dxyi xcweenta ra' gunna'h ra' rii' naa ziga dxyi'dxyi nin ruluu'yi. Gunna'h ra' rii' naa ziga chiohpa dxyi'dxyi nin bia'han Dxiohs: Agar naa mooza; mooza ca naa ziga dxyi'dxyi nin bia'han dxyi'dxyi Dxiohs cun Moisehs loh dahan nin laa Sinaí, nee llii'n mooza ca guyuu' ya xpiñih bi gaca ra' mooza xteenn lehyi. ²⁵Agar naa ziga dahan Sinaí nez loh ra' guihdxyi xteenn Arabia, per guihdxyi Jerusalehn naa ziga dahan Sinaí laasii nnah ri'chi naa hasta rii ra' bwiinn Israel cun llii'n ra' ba, zeenee ra' ba lehyi. ²⁶Per guihdxyi Jerusalehn nin nuu dxiba'a' ayi naan ziga tuhbi mooza, ya la'hnu'hn naa nu'h llii'n nan. ²⁷Squii' caa loh xchi'dxyi Dxiohs:

Biahxi, gunna'h nin ayi llii'n ñi'h; dxigah biahxi yi'h nin ayi gaann lu'h loh guelnazihdzi xteenn ra' gunna'h nin riuu' ra' llii'n ñi'h, laasii ziuu' ru llii'n gunna'h nin gule'he sto' che'hla ñi'h que gunna'h nin nuunee che'hla ñi'h.

²⁸Bwiitsi ra'n, la'hnu'h naa nu'h ziga zi guehtu Isaac; naa nu'h llii'n guehtu Abrahn pur dxyi'dxyi nin bia'han dxyi'dxyi Dxiohs loh ba.

²⁹Chin guulaa llii'n gunna'h nin naa mooza, guulaa bi laasii lligaaba Abrahn guhca guyuu' bi sto' xmaah bi, per ya bacha'ga dxil'dxi bi la'h nin naa llii'n pa'h che'hla Abrahn nin guulaa xcweenta dxyi'dxyi nin bia'han dxyi'dxyi Dxiohs cun la'h guehtu Abrahn, zi'chi za naa nnah.
³⁰Per ¿xi rñi' loh Xchihtsi Dxiohs? Squii! rñi'n: "Babwe'hecaa gunna'h nin naa mooza cun llii'n ba, tin ayi guica'ha llii'n gunna'h nin naa mooza xquelnaza'ca xteenn lu'h ziga nin rca'ha llii'n gunna'h nin naa che'hla pa'h lu'h." ³¹Pwihsí bwiitsi ra'n, la'h ra' nu'h ayi naa nu'h ziga llii'n gunna'h moozazi, sino que naa nu'h llii'n nin naa che'hla pa'h guehtu Abrahn.

Gulgui'hnn nadxiipa sto' tu loh guelriachii sto' xchi'dxyi Dxiohs

5 Gulgui'hnn nadxiipa sto' tu loh xchi'dxyi Dxiohs nin bani'hi Jesucristu la'hnu'h laasii guchii pa'h babwe'he Jesucristu la'h ra' nu'h loh xcweenta lehyi; basiapitii Ñi'h xtuhlda ra' nu'h chin gwachii sto' nu'h xcweenta xchi'dxyi Ñi'h, ni'chin nin ayiru

guibia'garii tu loh guelrsi'naa'ha xteenn lehyi.

²Na'h Pahblu rñi'n loh tu; sidela la'htu chuu tu bwa' tiixi tu ziga nin caa loh lehyi, chi'chi ayiru xi gallu'yi chechii sto' tu xchi'dxyi Jesucristu. ³Rñi'zahn stuhbi bwelta loh tu; garaa ra' bwiinn ra' nin xclaa'dzi chuu bwa' tiixi ñi'h, nahpa guzo'badxiahga bwiinn chi guunn ba garaatii' ziga nin rñi' loh lehyi xteenn Moisehs. ⁴Pwihsí la'htu nin xclaa'dzi guunn dzi'n ra' nin caa loh lehyi tin chapitii xtuhlda tu, pwihsí la'htu ya naa tu bwiinn ra' nin biria'caa loh xneziuh Jesucristu, nee cun loh guelruca'h sto' xteenn Dxiohs. ⁵Pwihsí la'hnu, pur xcweenta Spíritu Saantu nee cun xcweenta guelriachii sto', naann pa'h nu gudxihlli Jesucristu xcweenta xtuhlda ra' nu loh cruhzi, nee cayiinloh nu zi' pa' za Jesucristu stuhbi tin guni'hi Ñi'h guelnabahan za'ca nin naa para tu'pazi la'hnu, ⁶laasii la'h ra' bwiinn nin riachii sto' ra' ñi'h xchi'dxyi Jesucristu ayi zeena'ha ra' ba cweenta ziga gu nuu o ayi ra' ba bwa' nin laa circuncisión tiixi ra' ba; nin lasahcasihn chuu guelriachii sto' xteenn Dxiohs la'n lasto' ra' ba. Ya guelriachii sto' rii' ruhnn para rbahan ra' ba cun guelnadzii'hi lasaa!

⁷Per ¿a'gaa zeezah za'ca dxi'h tu? ¿Chyu ni'ca basiahchi sto' tu para basaa'n tu xcweenta dxyi'dxyi nin naa guchii? ⁸Gulgahcabwa', ayi ze' ni'ca pur lah Dxiohs nin rbwihdxyi la'htu, ⁹nee ayi dxia'lida sto' tu tuhbi bwiinn nin ruluu'yi xchi'dxyi lehyi loh tu naa ba ziga

levadura nin riahchi cohba harihn.
10 Na'h rgu'bwa'pa'hn xcweenta tu nez loh Dxiohs, ni'chin nadxiipa sto'n la'htu; la'n naann ayi chyu la'htu naa nin chechii sto' ñi'h stuhbi dxyi'dxyi, per bwiinn nin nusagui'hyi la'htu zusa'cazii Dxiohs la'h ba, nicala chyu chi'h zi naa ba.

11 Pwihsí ziga na'h bwiitsi ra'n, sidela na'lh zeezah gahca nugati'chih dxyi'dxyi xcweenta bwa' nin riuu' tihxí bwiinn, pwihsí ayi ñiuu' llahn sto' ra' bwiinn Israel na'h, ya zi'chi ayi ru chyu la'htu ñachii sto' ñi'h xcweenta ziga gudxihlli Jesucristu xtuhlda ra' nu'h loh cruhzi, per zi'chi naa xigaaba ra' ba. **12** Pwihsí, bwiinn ra' nin nugasagui'hi la'htu para chuu tu bwa' nin laa circuncisión, imalaayi guchyuu'gatii' ra' ba hasta naa ra' ba ndxi'hw!

13 Laasii la'htu bwiitsi lasaa' ra'n gudihdxyi Dxiohs la'htu tin ta'h tu loh lehyi pur xcweenta Jesucristu, per gulguia'hxgah ayi guica'ha si tu dxyi'dxyi ra' rii'bach'i'h chi'chi so'baloh guunn tu nin chi'h zi nin xclaa'dzi tihxí tu; mahzi nin guunn tu gulgahca nadzii'hi lasaa' ziga tuhbi tu ziga stuhbi tu, **14** laasii garaa ra' dxyi'dxyi nin caa loh lehyi tuhsí dxyi'dxyi rii' naa nin ruluu'yí: "Guhca nadzii'hi lasaa' bwiinn ziga zi nadzii'hi lu'h yi'h gahca." **15** Per sidela la'htu rdxihldxi tu, rahwyaa' tu lasaa' tu, rahw tu lasaa' tu, igulgahcabwa! Ayi la'h gahca tu guñihchi tu lasaa' tu.

**Xcweenta nin rza'bi sto' ra'
bwiinn nee guelnabahan nin
rudi'hi xchi'dxyi Dxiohs**

16 Rñi'n loh tu, gulguibahan ziga ruluu'yí xchi'dxyi Dxiohs

cun Spíritu Saantu xteenn Ñi'h, tin zi'chi ayi guibahan tu cun xcweenta ziga nin xclaa'dzi tihxí tu, nee cun ziga chi'h zi nin naa xigaaba tu, **17** laasii nin naa lligaaba xteenn bwiinn naa nin rdxyi'chi loh xigaaba xteenn Spíritu Saantu xteenn Dxiohs. Zi'chi za xigaaba xteenn Dxiohs ayi naan tuhbiloh cun lligaaba xteenn bwiinn, ni'chin nin ayi nuu guunn tu dzi'n nin xclaa'dzi tihxí tu guunn tu. **18** Per sidela cayuhnn tu nin ruluu'yí Spíritu Saantu Dxiohs la'htu, chi'chi ayi nahpa guunn tu ziga nin caa loh lehyi.

19 Guyaa dxiu'nbwa' ra' bwiinn xa ni'ca naa dzi'n nin ruhnn ra' bwiinn ra' nin ayi nu'nbwa' la'h Dxiohs; ruhnn ra' ba guelgubwhilli, rie'suh yihca ra' ba cohsa dxaaba, nee cun ziahan ru nin rnaaba tihxí ra' ba guunn ra' ba, **20** raann ra' ba dxaan ra', cun ruhnn ra' ba dzi'n bidxa'ha, riuu' llahn sto' ra' ba, rwa'ha dxaaba loh lasaa' ra' ba, rcha'gadxihldxinee lasaa' ra' ba cun naa ra' ba bwiinn nii ra', nee ayi guinagahn tii' rdxyi'chi ra' ba, nee ria'löh lasaa' ra' ba cun rlaa'ha lasaa' ra' ba, cun rbahchixchii ra' ba partidu ra!. **21** Naa ra' ba nin rza'bi sto' xixteenn lasaa' ra' ba, bwiinn gwaa' bwiinn nin rca'nzaa za'bi, nee ziahan ru dzi'n ra' ruhnn ra' ba; pwihsí ziga la'n guñi' la desde galoh, garaa ra' bwiinn ra' nin naa ra' squil' ayi nuu chut'ii ra' ba loh guelrnabwa' xteenn Dxiohs. **22** Per xtsi'n Spíritu Saantu xteenn Dxiohs naa guelnadzii'hi lasaa' ñi'h, guelriahxi sto', guelrbwihdxyii sto', guelpaseensi, guelralahsa sto'

lasaa' ñi'h, guelnaza'ca cun chyu chi'h zi bwiinn, guelnaguu'dzi sto', guelriachii sto', ²³guelnado' laadzi, cun guelnabwa' loh sto' nu'h cun nin xclaa'dzi tihxi nu'h guunn. Ayi nin tuhbi xcweenta lehyi nin ruxi'n guunn ra' bwiinn loh lasaa' ra' dzi'n ra' rii', ²⁴per la'h ra' nin ya gwachii sto' ra' ñi'h xchi'dxyi Jesucristu ya la'h ra' ba bacyuu'ga ra' ba loh garaa ra' duhlda nin xclaa'dzi tihxi ra' ba guunnan. ²⁵Pwihsি rbweeza Spíritu Saantu sto' nu'h, pwihsি zi'chi za chyu guibahan ziga rnabwa' Spíritu Saantu guibahan nu'h. ²⁶Ayi gaca nu'h bwiinn nayaachi, ayi guidxyi'lchinee lasaa' nu'h, nin ayi gaca nu'h bwiinn nin rza'bi sto' xixteenn lasaa' ñi'h.

Gulgahcanee la'h ra' lasaa' tu ziga tuhbi ziga stuhbi ra' ba

6 Bwiitsi lasaa' ra'n, sidela la'htu rdxeela tu tuhbi bwiinn lasaa' tu nin biaaba loh xiilla duhlda, la'htu nin ya rahcabwa' xa naa xcweenta xchi'dxyi Dxiohs gulguiñi'nee la'h bwiinn chi, nee gulgahcanee la'h ba tin garia'h ba loh duhlda; gulguiñi' loh ba cun dxyi'dxyi naguu'dzi'hngah, nee gulguia'h dzi'tsi tin ayi nagah nee la'htu dxiaaba tu loh duhlda. ²Gulgadi'hi nin rchi'hn ra' lasaa' tu; gulgahcanee la'h ra' ba tin zi'chi guunn tu guza'loh tu garaa ra' dxyi'dxyi ra' nin naa xlehyi Jesucristu.

³Laasii nin ruhnn lligaaba nuu chyu naa ba; bwiinn chi ayi chyu naa tii' ba, rusagui'hi ba la'h gahca ba. ⁴Tuhbigah tu gulcuu'bwa' xa naa xtsi'n tu tin gwa'ha tu gu

xnehza naan. Ya zi'chi ziinnasaan lasto' tu pur xcweenta nin galuu'y'i xtsi'n tu, ya ayi xtsi'n dxi'h stuhbi bwiinn, ⁵laasii tuhbigah ra' bwiinn chebiiga nez loh Dxiohs tin guti'dxi cweenta ra' ba xi bwi'hnn ra' ba.

⁶Bwiinn nin casagi'dxi xchi'dxyi Dxiohs, nahpa gacanee ba bwiinn nin ruluu'y'i la'h ba; gudi'hi ba nuhnzi xixteenn ba la'h bwiinn nin ruluu'y'i la'h ba.

⁷Ayi gusagui'hi tu la'h gahca tu; ayi nin tuhbi nin guunn gusagui'hi la'h Dxiohs. Nin ruhnn biñih tuhbi bwiinn ni'chi dxi'h naa li'hn nin rutia'a'ha ba.

⁸Per tuhbi bwiinn nin guunn dzi'n cweenta tihxi ñi'h, ya chin gadzihن dxyi'h nin guica'ha ba guelnaza'ca, ziñihchiloh tihxi ba nee ayi chuu ba loh xquelrnabwa' Dxiohs; per sidela tuhbi bwiinn guunn dzi'n nin badi'hi Spíritu Saantu Dxiohs la'h ba, chin guica'ha ba guelnaza'ca, neezaa guelnabahan nin naa para tu'pazi guica'ha ba. ⁹Ni'chin nnah ayi chyu gusaa'n loh dzi'n za'ca tin chin gadzihن dxyi'h nin dxi' guelnaza'ca, neezaa la'hnu'h gachica'ha ra' nu'h tuhbi guelnaza'ca roo'. ¹⁰Ni'chin cada chin rahldaaguzuh, gachidziaacanee nu'h nee gachidi'hnn nu'h bwen la'h garaa ra' bwiinn, nee mahzi ru para la'h ra' bwihtsi lasaa' ra' nu'h nin riachii sto' ra' ñi'h xchi'dxyi Jesucristu.

**Luulchima ra' dxyi'dxyi xteenn
Pahblu nee cun luulchima za
guelrgahpaDxiohs xteenn ba**

¹¹Gulguia'ha nali'hi lehtra nin cagaca'hn loh tu cun naa'hahn.

¹²Garaa ra' bwiinn ra' nin riuu' sto' ñi'h guunn nin xclaa'dzi tihxi ra' ba gaca, la'h ra' ba nin xclaa'dzi chuu tu tuhbi bwa'; ruhnn ra' ba squii' laasii ayi xclaa'dzi ra' ba guti'dxiloh ra' ba guelrza'cazii xcweenta nin gucah Jesucristu loh cruhzi. ¹³La'h ra' bwiinn ra' nin nuu bwa', ayi ruhnn ra' ba garaa ra' nin caa loh lehyi, per xclaa'dzi ra' ba chuu tu bwa' chi tin zi'chi guunn nayaachi ra' ba la'h ra' ba bwi'hnn gahn guyuu'tii bwa' chi tihxi tu, ¹⁴per na'h ayi xclaa'dzihni chuu guelnayaachi sto'n xcweenta ziga cohsa ra' chi, sino que ziga naa xcweenta nin guhchi Daada Jesucristu loh tuhbi cruhzi, pwihsu pur la'h xcruhzi Jesucristu garaa ra' cohsa dxaaba xteenn guidxyiyuh guñihchiloh ra'n para na'h, ya para ziga la'h ra' zahn naan ziga nin guñihchiloh

para la'h ra'n. ¹⁵Laasii sidela naa nu'h tuhsu cun la'h Jesucristu, nicala nuu nu'h o nicala ayi chuu nu'h bwa' xteenn circuncisión, nin naa mahzi bwen gaca nu'h tuhbi bwiinn nin badxa'h ya biuu' ba ganaalla lligaaba cuubi ra' pur xchi'dxyi Jesucristu. ¹⁶Garaa ra' bwiinn ra' nin nabahan ra' ziga ruluu'yi xchi'dxyi Jesucristu, zibwihdxyii sto' ra' ba xcweenta guelralahsa sto' xteenn Dxiohs, nee cun neezaa la'h ra' bwiinn Israel ra' nin gwachii sto' ra' ñi'h xchi'dxyi Jesucristu zahpa ra' za ba guelnasaa.

¹⁷Ayiru guunn tu llahn na'h nnah loh delaanta; laasii sehn ra' xteenn bwa' nin nuu ti'xihn rluu'yi naan tuhbi xmooza Jesucristu.

¹⁸Bwiitsi lasaa' ra'n, la'h Daada Jesucristu guunntaa'yi yihca tu. Zi'chi gaca pwihsu.

Dxihtsi nin baca'h San Pahblu loh ra' bwiinn Efesu

GuelrgahpaDxiohs

1 Na'h Pahblu, naan tuhbi
pooxtla xteenn Jesucristu
laasii zi'chi xclaa'dzi Dxiohs gaca.
Pwihs cagaca'hn dxihtsi rii' loh
tu bwiinn Efesu ra' nin baguyuu'-
guya'zi guelriachiisto' xchi'dxyi
Jesucristu, neezaa loh ra' nin ruhnn
ziga pa'hca xclaa'dzi Ni'h gaca.
2 Gulguica'ha guelrahcanee cun
guelrbwihdxyii sto' xteenn Xtaada
Dxiohs nu'h cun nee xteenn Daada
Jesucristu.

Ruluu'yi Pahblu xcweenta guelrza'cazii nin bat'i'dxiloh Jesucristu pur la'hnu'h

3 Pwihs gachiñi'za'ca nu'h lah
Daada Dxiohs nin naa Xtaada Daada
Jesucristu, nee ziga naa nu'h tuhs
cun Jesucristu nin nuu llaa'ndxibaa'
ni'chin nezchi riinloh garaaloh
guelruhntaa'yi nin rahcanee Ni'h
la'hnu'h. **4** Dxiohs gulii Ni'h la'hnu'h
pur xcweenta Jesucristu galohyi
chin nagahdxi cwachixchih Dxiohs
guidxyiyuh tin zi'chi loh si Ni'h
chuu nu'h guidi'hnn nu'h xtsi'n
Ni'h cun guelnayaa lasto' xteenn
nu'h nee la'h si Ni'h gaca'hsto'

nu'h. **5** Nee guca'ha Ni'h la'hnu'h
tin gaca nu'h ziga llia'n dzi'tsi
pa'ca Ni'h pur xcweenta Jesucristu,
laasii zi'chi bwi'hnn Ni'h lligaaba
pur nin bayuu'n sto' Ni'h la'hnu'h.
6 Pwihs pur ni'chin rachiñi'za'ca
nu'h lah Dxiohs garaa dxyih pur
ziga bayuu'n sto' Ni'h la'hnu'h, ya
bwi'hnnntaa'yi Ni'h la'hnu'h pur nin
naa nu'h tuhs cun Llia'n Ni'h nin
nadzii'hi Ni'h. **7** Ya ziga taantu nin
guhca nadzii'hi Dxiohs la'hnu'h,
balda'h Ni'h la'hnu'h loh duhlda pur
xcweenta rihn nin guxi'hi Llia'n Ni'h.
8 Dxiohs cagaluu'yi Ni'h balaaca
chi'h nin nadzii'hi Ni'h la'hnu'h
ziga cagani'hi Ni'h guelnasiin
cun guelrahcabwa' la'hnu'h,
9 nee cagaluu'yi za Ni'h la'hnu'h
dxyi'dxyi ra' nin nuugula'n Ni'h
loh xigaaba Ni'h nin ayi bwi'hnn
Ni'h para ña'zidzhiahga ra' bwiinn
dez galohyi laasii bwi'hnn Ni'h
lligaaba nahpa guluu'yiloh dzi'n ra'
chi pur xcweenta Jesucristu, **10** per
nahpa zadzihm dxyih nin soobaa
garia'caa gaca ziga lligaaba nin
bwi'hnn Dxiohs, ya loh dxyih chi
zutiaa'ha Dxiohs garaatii' ra' cohsa
nin nuu nez dxibaa' cun nin rii loh
guidxyiyuh tin guti'dxi Ni'h la'h